




**Presentadu in Orane su libru de poesias de Ignazio Camarda:**

*"Custa bella de ervas famiglia e de animales", cun su sutatìtulu "Arvures, erbas, abbas, montes, campos, ortos de Sardigna" .*

de Domitilla MANNU

"Custa bella de ervas famiglia e de animales", cun su sutatìtulu **"Arvures, erbas, abbas, montes, campos, ortos de Sardigna"** (editziones Edes) est su libru chi est istadu presentadu chenàbura 21 de martzu in s'Auditòriu comunale in Orane, sa bidda in ue est nàschidu s'autore, **Ignazio Camarda**. A cummentare custu libru nou de su professore de botànica de s'universidade de Tàtari, sunt istados su sindigu de Orane **Franco Pinna** e unu grustu de àteros cummentadores: **Nicola Tanda, chi at iscritu puru sa prefessione de su libru, Angelo Aru, Antonio Brundu, Ferdinando Buffoni, Giulio Chironi, Gian Battista Fressura, Pietro Luciano, Giginu Maoddi, Attilio Mastino, Stefano Modolo, Totoni Pinna, Giuseppe Pulina, Bachisio Solinas, Renato Soru, Giorgio Todde**. S'Auditòriu comunale fit prenu de zente, amigos e connoschentes oranesos e àteros meda, lòmpidos dae logos a tesu a li fàghere corona, ma mescamente a dare testimonia de istima a un'òmine chi cun sos istùdios e sas òperas suas faghet onore a totu sa Sardigna. Sa presentada de su libru est istada coordinada dae su giornalista **Giacomo Mameli** chi at faeddadu in sardu gasi comente medas àteros chi sunt intervènnidos. At serradu sa presentada s'autore, chi at torradu gràtzias a totus e at faeddadu de comente est nàschida s'idea de iscriere su libru, inrichende s'arregonu cun ammentos de pitzinnia ligados a s'ambiente e a sa natura, e de viagios de istùdiu in terras istranzas e in Sardigna, chi l'ant dadu argumentos e ispiratzione pro iscriere. Su titulu de su libru est s'anàstrofe "Questa bella d'erbe famiglia e d'animali" leada dae sa poesia **"I sepolcri"** de **Ugo Foscolo** e mancarì custu siat unu versu nòdidu, non totu sos chi ant

leadu parte a s'atopu s'isetaiant de s'agatare a denanti unu libru de poesias. Est istada una surpresa agradessida e, a abbisu nostru, custu libru est un'àteru contributu de importu pro sa literadura in limba sarda. S'autore iscriet in sa nota: *"In s'iscrìere de natura, de ambiente e paesaggiu, sa limba sarda at ammustrau una solididade e una 'ortza sua matessi, e medas vortas appo appiu difficurtade, achende a fiancu sa tradutzione in italianu, a acattare una paragula ch'aret cherfiu narrere propiu su chi chèrio"*. E posca sighit cun un'aura: *"Ispero chi sos chi ana a cherrere leghere, chircande carchi paragula mesu irmenticada, appana disizu a torrare a pessare a sos campos, a sas iscias, a sos rivos e a sos animales masedos e agrestes e cussiderene sa limba sarda comente parte de nois*



*matessi, comente una cosa de cumone chi est zustu chi arreet viva."* Est unu libru de poesias iscritas no intames sighende su filu de sa memòria e de s'imaginassione, ma betende s'ojada abbista a totu sos dannos chi sunt istados fatos a sa terra nostra; sa fùria de su fraigare in totue, su degogliu de s'ambiente, s'abbandonu de sas campagnas, sa piaie de sos fogos e sa pèrdida de sa biodiversidade. Sas poesias sunt bortadas puru in italianu, e cumprit su libru unu glossàriu de sas paràulas de sos nùmenes de sa natura mentovados in sas poesias.

Tàtari 24/3/2014